

推

篷

寤

語

推篷寤語卷之六

雲間李豫亨 元薦甫

還真篇

元薦氏曰嗟夫真妄之難辨久矣宋晁文元公云
無形而常有者真也有形而終無者妄也真妄苟
辨覺生其中余研究斯旨固知天下若事若物苟
有成有敗有去有住有生有滅者皆妄也真性圓
明妄則何有今之不違真而逐妄者或寡矣夫逐
而不止則流而忘返如人去其室家而不知還也

故名其篇曰還真思以節人情之流佚俾約之自外而之內云爾

還本性之真

世間爲許多沒用底勾當將無限的好歲月瞥爾消磨盡了人生世間或潛跡丘園或浪遊湖海或馳騁天衢或屈蠖泥塗或游心伎倆或落魄九流總是於道無得于己有損徒苦身心何如將此等歲月用在自己身心上磨鍊一場到頭當有所得豈比尋常聲塵杳無捉摸

血氣心知之所及者乃凡心非真心也血氣心知之所

不及而能知者乃真心也嘗見夏月蚊嘖人方睡時
心不知也手足能祛之殄之真心之所爲也至於遇
殷憂則神不寐遇戰鬪則身戰慄有凶事則心動悸
心欲強制之而不能亦真心之所爲也真心之謂神
神之謂天凡心之謂形形之謂人

爲學下功止有一捷徑法門惟要去凡心至緊逼撥得
一分凡心退則見一分聖心逼撥得十分凡心退則
見十分聖心如天有雲霧去得一片雲霧則露出一
片青天若一天無雲霧則目中俱青天矣非有別法
也但隨事隨時處中此又有一段工夫然凡心旣退

則中亦隨見去凡心工夫占了九分合中體工夫止
占一分故曰克已復禮克已去凡心也復禮合中體
也顏子幾於無我已到克已地位未達一間正是合
中工夫猶欠故夫子告以復禮之目

凡心掃除極難譬如陰雲旋散旋合須用迅掃工夫時
時打疊猶恐復翳有用十二時工夫而一時中仍發
作者有用盡一生工夫而頃刻中卽變易者爲根性
自歷劫來埋種深固難於頓除如撲滅燎原少存星
星之火未息煽之滋熾學人心地須如冷灰枯木始
得六祖譚經云時時勤拂拭莫使惹塵埃雖是中乘

法門吾人却有依據

或問去凡心之方曰懲忿窒慾忿高如山最難平慾深
於澤最難滿聖人係損彖曰山澤損君子以懲忿窒
慾已明指蹊徑矣

真性如青天中體如天之日月去凡心披雲霧而覩青
天也合中體仰青天而見日月也日有中晷月有虧
盈原無定所事有常變理有經權寔無定用然仰青
天則日月之明有目者所共覩

操煉工夫全要在遇境上不退轉方有進步如遇境上
退轉就平素說得天花亂墜也沒用就平素探索考

究得精也沒用就平素品評人物籌量得到也沒用
蓋緣終不是自己的須是自己磨煉得如見火的真
金一般越煉越剛投之所向無入不得心地圓陀陀
光燦燦有楊柳風梧桐月氣象方是真人境界不然
遇境來前如貧賤富貴威武等事萎然而靡道心退
轉矣

識性習熟最難湔除深入性中埋種堅固雖歷數十年
不失譬如小技紡筆琵琶樗蒲射獵之類其藝至微
若復耽戀與性相習雖切戒終莫能除復遇此種好
卽旋生程子所謂見獵不覺有喜心者良然也然則

何如曰是在窮理耳勘破此好從何而生知自無明
中生元非性中自有雖復學習於我何益於己性何
與一一覷破其好自除心地自然清涼與愚蒙者迥
別

唐陸象先嘗謂人曰天下本無事祇是庸人擾之始爲
繁耳因悟心間本無事率由妄念擾之始爲煩耳人
欲不擾天下之事當先使諸念不擾吾之心欲諸念
不擾吾之心當先自無欲始無欲則心清心清則不
擾施之天下將靜而正矣

人中之雄馬中之龍皆由天性非由習也項託七歲爲

孔子師甘羅十二歲而爲秦王相豈假學習哉漢孝
昭帝十四歲辨上官桀之詐司馬溫公七歲而出投
甕之兒其餘英哲之士悉由少作學特以充之耳非
能改其天性也聞虜中試馬置母馬山顛置其子山
下一馳而及者爲上再馳而及者爲下三四馳而不
至者殺以供士卒人亦猶是也豈惟靈異之性卽昏
鈍兇殘諸性亦定之於初不復可易人能勉強學習
磨礪所偏僅可少損耳

富貴如浮雲非獨富貴其貧賤夷狄患難亦浮雲也富
貴非自性分中來其貧賤夷狄患難亦非性分自有

所遇之境不同耳君子無心處富貴亦無心處貧賤
夷狄患難一惟其理休休怡怡無不自得焉不爲利
回不爲義疚斯之謂見性

君子之行禮也將以順人情也多飾則僞僞則亂矣故
周旋曲折升降揖遜行其所不得已也簠簋俎豆牲
載酒醴陳其所不能自止也聖人亦惟順之而已矣
聖人順其所不能自己之情因而飾之無所容心也
非無容心也無所容私心也此之謂真性之發見此
之謂中體之合度

聖人雖不外人性作儀大抵觀法教習之功居多是故

馬之銜勒牛之輓軌不可缺也生民雖有五倫之性
若使置之空閒寂寞之濱深山窮谷之地蚩蚩蠢蠢
不知朝廷之法聖賢之教一旦置之禮法之地欲一
一周旋如度萬無此理矣近時諸公有良知之教謂
一明良知頭頭是道是欲以空閒寂寞之夫深山窮
谷之子而行朝廷升降揖遜之節也其不舛施而倒
置者幾希故謂良知爲本性之真則可謂任是性而
卽合天則則不可

王臨川作禮論云荀卿謂聖人化性而起僞若以爲天
性無是而可以化之使僞則狙猿亦可爲禮狙猿之

形非不若人也欲繩之以尊卑而節之以揖遜則彼有趨於深山大麓而走耳雖畏之以威而馴之以化不可服也予以爲此不足服荀卿之心今乞人之於狙猿持杖而教之跳躍頂禮跪拜無不如志以畏威也亦猶人之畏威而爲禮也胡不辨之曰狙猿固不可爲禮蠱蟻獨不知君臣乎其孰化之而孰僞之也生民之於五教猶蠱蟻也豈無尊親之性哉聖人以禮文緣飾之耳

有醫氏攜復春詩卷謁道林題絕句云安排必定知由我變理從來自屬人堪嘆世人渾不解九還丹裏苦

偷生陽明先生一見驚曰此人有志十分端確者道
林自謂吾平生學問多自貧病中得之蓋先生於此
煅煉精純自知自信有莫知其所以然者遭母憂比
葬世俗時日方向拘忌之說一切不用惟擇土色黃
燥處以大統曆所載吉日行事繼配李氏卒舉柩將
葬鑿墳見水衆莫知所措先生曰吾妻也卽令昇還
舍後旬日改卜兆而藏焉其破俗率類此先生惟四
孟歸祀祖考餘日惟端坐愼獨而已

禪門高士能使二虎侍從鬼神服役天龍圍繞頑石點頭
控鶴冲天飛錫躡空其餘神通不易殫述僧俗詫

異不知吾教天地位萬物育百獸舞鳳凰儀魚鼈咸
若山川鬼神咸寧四靈畢至鳥獸卵育皆可俯窺其
效尤非僧比

文洪先生有自警古體云人生受斯理厥初本無偽一
物爲之役聖賢始懸異惟聖乃克全浩浩莫匪天弗
假思與勉所欲咸自然衆心緣汨沒斯理未統一惟
學能反之茲焉造其極反之曰伊何亦曰慎其獨日
用亦云糾罔俾有纖惡一念隱以微淵然人靡知而
我於斯時必謹察其幾暗室屋漏中神明常在側翼
翼深自閒天理何曾息此詩精融李西涯稱其根於

經術非詞人藝匠所能道

言之與聲猶如風鳴如谷響風靜響息凝寂如故孔子
曰予欲無言還其本真之天也嘗讀傳記云張忠字
巨和中山人也永嘉之亂隱於泰山恬靜寡欲清虛
服氣以至道虛無爲宗其教以形不以言弟子受業
觀形而退年在期頤視聽不爽然則張忠者其亦有
聞於聖人無言之旨哉

凡十八章

還倫理之真

忠莫大於不欺孝莫大於能愛擴而充之一念之或欺

非忠也一體之不受非孝也忠且孝則性天不昧性
天不昧則淨而明矣故淨明道法必以忠孝爲修行
之本實群仙積功累行之先務也噫道家感格諸天
濟度群幽尚不能外忠孝爲本况身斯道之責者其
力行忠孝宜何如或問何以盡忠曰不欺爲忠充而
至於念念無所欺是爲盡忠何爲盡孝曰能愛爲孝
充而至於無所不愛是爲盡孝

世人忠孝率從外求不知忠之一字不必仕進而後能
致君澤民也人之心君爲身之主宰一念欺心昧理
不可對人言卽是昧厥本身之君故此心不欺昧卽

仕進不仕進皆可謂之全忠也孝之一字豈必事父母能竭其力卽如身是父母遺體但行住坐卧十二時中善自崇護不獲罪於五臟故雖父母存與不存皆可謂之盡孝也若外事親則盡敬而中置身於不善之境以虧辱其身體雖名為孝非真孝也故善事身心卽名真忠孝豈必仕進而後爲忠豈必有親而後爲孝乎

剔股之事雖不可以爲訓然每見割股者未嘗不隨手瘥療以此見一念真誠神明自可感格鄆人剔股奉母母疾遂瘳張密性篤孝母病齋戒割股進之疾遂

愈雷天錫年十一歲父疾甚剔股縷切以進父飲下咽輒避如是者不可勝紀嘗聞割股者云肉脫有聲療疾驗者割肉處不甚痛亦不會腐舉心誠孝神明儼然奚可玩褻視哉

不順之子多生不順之兒不弟之人每毓不弟之嗣應若桴鼓人謂此爲天道信乎曰非然也人物以形相禪不順之子心旣悖逆則其禪形而生子亦卽其悖逆之心所化也故亦生爲不孝之子不友之弟心旣殘忍則其禪形而生子亦卽其殘忍之心所化也故亦生爲不友之子非偶然也雖然父兄雖未盡孝友

而其子能力行以蓋前愆者如之何曰此則不囿於形氣邁迹自身其希舜之徒與

回回大師經云其國有伏法重囚對主者曰吾死無詞但令吾母一見死而無憾卽令見之囚曰我生時食母乳我今死也亦欲食母乳全我始終旣食其乳卽嚙死其母官責其故囚曰我今死於不法是母教我我也我未會言語時母卽教我罵人及其能行也教我瞞人我取得物歸家則愛我喜我我積漸至於今日所以恨之也蓋此等之習乃天下之通患也在正室則姑息其嫡在寵輩則各私其庶父愛長子母憐幼

嬰纔有所偏則子嗣先有所恃而不從師訓戕賊患
害具出於此古云偏食致病偏愛無尊良有以也

人多一時置妾而不知子嗣之爲累少年置妾中年多
子此晚年之累中年置妾晚年多子此身後之累所
遺穠厚更相告訐或有因而破產者有之所遺涼薄
無所依倚或有因而流落者有之臨岐悲嘆或無及
矣

文中子曰以勢交者勢傾則絕以利交者利窮則散魯
仲連曰權交者不久貨交者不親此有所恃而後交
者也若孔子其交也以道其接也以禮天下其誰能

攜之此七十子所以周旋而不忍去也雖然水至清則無魚人至察則無徒論交之道又在尊賢而容衆則賢愚皆爲所包容矣鄙哉孝標著論絕交何與

余忠宣公染習寓語云人若近賢良喻如紙一張以紙包蘭麝因香而得香人若近邪友喻如一枝柳以柳穿魚鱉因臭而得臭結交警語云君子相親如蘭將春無天色之媚目有清香之襲人小人相親如桃將春有天色之媚目無幽香之襲人公名闕元季死節名臣觀其自警之言如此人之擇交可不慎諸僧家有伴玄門有侶吾儒有友朋三教中俱不可無友

以爲道德之助如陶元亮之南村寒山拾得之豐干
虎溪之三友皆其識見德行相似有相發者故其知
與特厚故曰人之相知貴相知心惠施死而莊子寢
說鍾子期死而伯牙終身不復鼓琴人遇知己獨爲
難也富貴他人合貧賤親戚離若斯友者又惡足算
哉

公孫弘舉賢良鄒長倩贈以生芻一束素絲一稊撲滿
一枚作書告之曰芻之爲物縱之則亂束之則謹十
忽爲絲絲至微也十忽而後成則物未有不積微以
至著者撲滿者以土爲物而用蓄錢者也有入穴無

出竅滿則撲之知束芻之意則能謹密而不失知素絲之意雖小而必爲大知撲滿之理善積而能散弘聞其言稽首再拜而後受漢猶近古故友朋能贈人以言聞者亦能受人盡言自漢而下此風不競能舉鄒長倩之說以告友者殊少聊舉其言以告如弘者焉

謝隄自蜀之京師過洛而見程子曰爾將何之曰將試教官程子弗荅隄曰何如曰吾嘗買婢欲試之其母怒而弗許曰吾女非可試者也今爾求爲人師而試之必爲此嫗笑也隄遂不行予謂治教一也觀程子

不使謝隄之試於教其忍使尹何之試於政乎子產之見與程子昭合矣

巴郡士人牟麟好學不厭而樂於教人守道廉退非有大故不出戶庭歲時起居有受謁無出謁貧甚而未嘗怨尤郡守溫瑀辟請爲從事旣不起丞于扈往邀之接語移時所談皆安時順變善身避世之語扈欲致守之意而辭不得達又有蘇尚功者學業未終開門受徒以師自任而性好奔競足跡不少安求請省問奴顏婢膝殆無虛日嗚呼二子所爲冰炭若此君子小人之所由分也今之士人其尚師麟而資尚功

哉

凡十二章

還世路之真

昔人以酒爲醉鄉以閨房爲軟溫鄉以任官爲帝鄉謂之鄉者正緣處之甚易去之甚難情所易溺故耳然麤蕪腐腸粉黛伐性孤犢而見被文繡辭隱而取譏北山其謂之何情之所在雖聖人不能絕在領之而已如彭澤之賦歸來宋玉之賦襄王邵康節之詠微醺涉而不存亦何害於情之正與

人生所以苟富貴者卽爲富貴有受用却不知反有不

好處叢怨長傲賈禍啓奸導淫增侈起人妬忌惡孰
大焉人生所以厭貧賤者卽爲貧賤沒受用却不知
亦有無限好處養德頤神遂志益氣全身立名得人
憐惜善孰大焉然人所以求富貴利達者匪獨爲已
亦爲妻孥却不知妻妾有分子孫有命縱有厚遺祇
恐無益貧賤之家其妻室子孫習見家翁祖父勤苦
力耕節用反足支遣其間省費自己心力與營營者
大有逕庭

粉飾華美陳設侈盛眩耀俗目而實取譏於君子蓋緣
俱是外物何所當於身心而顧來讒忌之口則何益

矣君子貞素外防純白內備不爲芬華美麗之所移
易行苟無慙布袍可暖心誠不疾萊根可嘗古人雖
位至卿相廳事僅容旋馬其明哲矣夫

祿位神物也求者不可得有者不可得守守者不可
得又所以然者數有定分也今之人因浮名冗利假
貴虛榮過求而致橫死者莫知其數殊不曉影外影
爲三等妄夢中夢是兩重虛紫綬朱紱青布衫顏色
不同而已矣三台八座九品官名目不同而已矣中
外歷職大采選也官曹決事大雜戲也而妄認爲已
有不亦惑乎哉白樂天曰窮通不由已懽戚不由天

命卽無柰何心可使泰然且務由已者省躬諒非難
勿問由天者天高難與言

白公有詩句云富貴亦有苦苦在心危憂貧賤亦有樂
樂在身自由又有詩句云閒傾三數酌醉詠十餘聲
便是羲皇代先從心太平心太平之語最有味心太
平則身太平身太平則家太平家太平則國與天下
亦由之太平矣

向子平云富不如貧貴不如賤然未嘗引證其事今以
古人富貴之極者二事爲驗石季倫奢豪角勝可以
言富矣及孫秀矯詔遇害嘆曰奴輩利吾財耳隋越

王侗留守東都及唐公起義而東都之臣立侗爲帝
仍號皇太主可以言貴矣遭王世充威勢所逼乃焚
香發願從今已後不生富貴家舉此二端則富不如
貧貴不如賤之說益信

唐費冠卿元和二年及第以祿不及親永懷罔極之念
遂隱於池陽九華山長慶中殿中侍御史李行修舉
冠卿李節拜右拾遺制曰前進士費冠卿嘗與計偕
以文中第祿不及於榮養恨每積於永懷遂乃屏身
丘園絕跡仕進守其至性十有五年峻節無朋清飈
自遠旌孝行舉逸人所以厚風俗而敦名教也宜承

高獎以儆薄夫薄參近侍之榮載佇移忠之效可除
右拾遺冠卿竟不應徵命夫費冠卿之思孝李行修
之知人唐室之善敦風唐賢之能演誥四美具矣用
補清談

郭延卿以文行著名厭世澆薄葺園圃於水南居之凡
二十餘年足跡未嘗至城市交游薦於朝得官不就
錢文僖惟演爲留守謝絳爲通判尹洙爲掌書記歐
陽脩爲推官慕其爲人一日屏侍從同謁延卿對談
良久延卿以陶樽果藪進文僖愛其野逸引滿不辭
至晚府吏牙甲至始知留守相公曰不圖今日肯顧

野人相與大笑更進數杯暨日入辭歸延卿送出曰
某老病不能造謁幸勿訝文僖登車茫然自失如入
神仙之境旣而歎曰此人視富貴爲何等事

李泌極聰慧年七歲已能文嘗賦長歌高自稱銜莫不
嘆賞獨張九齡力戒之曰藏器於身古人所重今君
早得美名必有所折宜自韜晦庶幾成德况童子乎
泌悟泣謝從此不復自銜後爲一代名相年少有美
才者切當自晦不宜躡取時名畢竟終無受用

許莊敏公晚年益純粹嘗謂子弟曰吾閒中舉壯年所
好一一試諸心俱已相忘惟至圖書尚似留滯然亦

不太甚也又曰吾近見士人因失官憤懣而死者吾甚惑之夫官朝廷物也來若被衣去若解帶豈吾支體若乎故公雖屢進屢退未嘗見喜怒之色被衣解帶語深近道故表見之

謝濤爲太子賓客生平謹慎恬於榮利晚節乞知西臺尋除洛中不接賓客日覽舊史一編以代賓話將終前一日夢中得詩一章覺呼其子景初錄之百年奇特半張紙千古英雄一窖塵惟有淵然周孔教至今仁義浸斯民無幾卒此詩足以見篤於仁義著於神明至沒而不亂也謝公真特達英賢之士哉

孔若思歷庫部郎中常曰仕宦至郎中足矣座右置止水一石以明自足之意人之所受各有分量非獨庫部也有仕丞簿而志卽滿者有至監司而志卽滿者有已至卿相而志猶未滿者譬如河海溝瀆所受之分量不同也君子亦因已之分量而已不當以祿位之大小爲盈歉居其位則思盡其職食其祿則思守其官迨其不行吾志而後已若志薄軒冕而猶徘徊仕途跡踈林下而猶盡道休官者無乃不盡其量與常表微授監察御史不樂曰爵祿譬如滋味人皆欲之吾年五十冒游少年間取一班一級不見其味也將

爲松菊主人不媿淵明韋公之見卓矣然人生仕宦自有正味當于有味中求無味則不生於貪戀於無味中求有味則不病於尸素

楊玠仕蜀爲顯官隨王衍歸後唐以老致仕歸長安舊居多爲鄰里侵占子弟欲詣府訴玠批狀尾曰四鄰侵我我猶伊畢竟須思未有時試上含元殿基望秋風秋草正離離子孫遂不敢言須思未有時之語甚達往時有宦室憂子孫不能繼有鼠入牛角之嘆同官者諭之曰我輩自窮秀才叨俸餘得此產業縱子孫不能守亦不失爲一窮措大也相視解頤然則宦

室之言非聞楊玠之詩而有悟與

張翰會稽人賀循赴會入洛經吳闔閭門於舟中彈琴
翰初不相識乃就循言談便大相欽悅問循知其入
洛翰曰吾亦事北京便同舟卽去不告家人晉惠朝
齊王冏辟爲東曹掾謂顧榮曰吾本山林間人以明
防前以智慮後榮曰吾當與子采南山蕨領三江水
耳因秋風起遂起蓴鱸之興嘆曰人生貴適意耳富
貴何爲迺引去噫嘻以明防前以智慮後此隱士之
素節也若翰者非所謂明哲君子哉

白樂天爲翰林學士有松齋詩云非老亦非少年過三

紀餘非賤亦非貴朝登一命初才小分易足心寬體
長舒充腸皆美食容膝卽安居況乎松齋下一琴數
帙書書不求甚解琴聊以自娛夜直入君門晚歸臥
吾廬形骸委順動方寸付空虛持此將過日自然多
晏如昏昏復默默非智亦非愚予旅寓都下幾一載
餘朝夕俛仰欽止前躅因采入籍中爾

古今以來載籍旣多何所不有或修德而遭橫譴或積
善而遇災害或施恩而酬以怨或守清而汚以貪或
德厚而得小官或求全而得毀謗如此之類不可縷
舉人以爲異不知是乃天下之大常也當此之際卽

宜推理安常任運而過若不勝其私而汲汲以鳴其不平是亦小丈夫而已老子云不知常妄作凶

忍之一字於世路極有益人不能忍則有惡事發作譬如暴風起濤坐致覆沒能忍之者必得惡事消滅譬如沸湯沃雪不暫停留嘗讀晉劉毅對武帝之言比帝爲桓靈武帝笑而容之人君尚然餘人忍受惡言其理差易故受人凌辱畏其勢而忍之者不足爲忍無可畏之勢而能忍之者斯真爲忍也忍之時義大矣哉

文中子謂薛收善接小人遠而不疎近而不狎竊謂接

君子易接小人難不善接君子止於有過不善接小人必有禍蜀志關羽張飛之事可鑒矣故善接小人斯可謂明哲君子

禪家謂利衰毀譽稱譏苦樂爲八風註者曰得可意事爲利失可意事爲衰背後排撥爲毀背後讚美爲譽現前讚美爲稱現前排撥爲譏逼迫心意爲苦悅適心意爲樂世人因此八箇字奔走一生究竟瞥起瞥滅終非實際世人橫生愛憎迄無休止何耶昔韓子云聞毀言不加阻聞譽言不加喜此對病之藥乎

山生金石生玉反自剝水生蟲反自食人主事還自賊

夫好事者未嘗不中爭利者未嘗不窮善游者溺善
騎者墜各以所好反自爲禍故老子曰不爲福先不
爲禍始欲福先無禍欲利先遠害故無爲而寧者失
其所寧卽危無爲而治者失其所治則亂旨哉玄真
子之言之也其人生事還自賊及欲福先無禍欲利
先遠害之語尤有深味

凡草木經寒不彫常青者必非開花灼艷可喜者也
如淇園之竹澗底之松大谷之柏寧觀之石楠天堦
之女貞皆非有美艷花實可翫可賞然翠如碧玉蟠
如青瑤經冬不落千年不壞爲世所貴重世之夭桃

紅杏白李青梅艷冶一時數年之後伐爲薪材又烏足尚也君子務實去名闇然不求外飾焉者以此羽翼美者傷其骸骨枝葉茂者害其根莖能兩美者天下無之故飾其外者傷其內扶其情者害其神見其文者蔽其真故與齒去角與翼兩足非獨天道然人事亦宜爾君子慎無忘內而崇外飾哉

麝以香實害象以齒自焚翠以羽致戕蚌以珠見剖蘭茁而摧松明而煎物之無卽於人而人自卽之者惟人亦然非直禽獸草木而已也君子雖自修猶畏人知韓昌黎曰德高而毀來行高而謗興盛名之下君

子弗居匪固惡夫名也惡夫德之不澡而名爲之叢焉固謗之國也而況敢自矜自炫以召禍乎

衆人之動止內外之分不定榮辱之境不辨以有名爲尊榮以無名爲卑辱情貌之易不易乃在於人之觀不觀是以畏威畏刑畏鬼畏人愁結其五臟桎梏其形體終身役役與化俱徂曷不思吾之爲我奚假於人審夫吾之我則衆人之觀不觀不足知吾之情貌不必易矣是以君子貴其在我

精神者天之分故清而散骨骸者地之分故濁而聚精神離散各歸其真尚何有於我哉故曰精神入其門

骨骸反其根我尚何存人處世間橫計我所以精神
殉名利以骨骸競貨財至老奔走曾無止息豈知我
本非我特竊造化之餘而妄認爲我耶

人皆以卽時稱我者爲己身夢中亦然一生之中其夢
無數定以何者爲我身又以卽時所居之宇爲己家
或士或庶改卜經營不定果以何處所居之宇爲己
家又以先世相承生育之地爲己鄉亦有遷移隔絕
別成故里者果以何處之地爲己鄉復有舟居之民
舟中生子其子但以舟爲家舟之往來不停亦有改
造易換其舟者此舟中所生之子果以何舟爲家何

處爲鄉耶故樂天有自悔之詞云無妄言無浪憂此中是汝家此中是汝鄉汝何捨此而去自取其遑遑又有詩云我心本無鄉心安是歸處白公大達故錄其詩以警夫世之執迷拘方者

人無全知物無全用尺有所短寸有所長余觀古之貴盛者或阻於壽考富厚者或閒於子嗣非甚盛德者則於世間諸福似不能咸備此蓋有天意主之鬼神司之非可知力全也古云天不滿東南地不滿西北天地尚不能全而況於人乎古人不成三瓦而陳之正是此意在人守謙持盈以俟之耳若諸福備具百

順咸聚此又自夙世修種現世重積而來天意有在
非人所能測識也

天下事無全勝亦無全敗卽如富貴貧賤夷狄患難諸
境富貴無衣食慮而所慮在憂危貧賤無擔當憂而
所憂在飢凍處常居夷狄患難亦復如是天下無
全好處使有全好處則古人擇而處之矣是知位不
必擇也夷險順逆差殊不遠能以道處之則諸境可
以一視無入不得此聖人安樂法門

人之所以不知足者止爲人勝於己已不若人殊不悟
人生世間切於身心及庶事之不如意者總名爲苦

而歷觀甚於已者至多切於身心及庶事之得如意者總名爲樂而歷觀不及已者亦至多如是以已方人有何不足老子曰禍莫大於不知足

韓詩外傳云君子宜避三端文士筆端武士鋒端辨士舌端爲筆端則損名鋒端則殞身舌端則亂真也余以爲不然君子內省不疚何畏乎筆端守死善道何畏乎鋒端直道而行何畏乎舌端雖然此語其平時也若爲法受惡則筆端亦不得避矣見危授命則鋒端亦不得避矣愠於群小則舌端亦不得避矣士君子亦視吾理之當否而已矣三端皆外相也庸避之

可為

滿者傾覆之機也古云滿則覆又云滿招損常見今人仕宦每至自滿之地則仕進亦自此而止有初出仕而卽滿者有仕至州郡而後滿者有仕至藩臬而後滿者每見仕途卽於此處就有齟齬又見有仕至卿相而猶未滿者則其福量尚未有涯埃也功覆天下能蓋一世而猶不自滿假焉此大禹所以受舜禪而澤及無窮也古記云履盛滿則思抑損君子兢乎其兢防乎其防抑損之心無時可已

世間人中二顛倒者十有七八其一少而嘗勤以圖身

計而反自放逸老而無成故古人有詩二少年經歲月不解早媒身晚歲成何益低眉向世人其一老而當逸以就便安而反自勞役老而彌苦故古人有詩云可憐八九十齒墮雙眉昏朝露貪名利夕陽憂子孫唯此二事知之不難而世人之知者尚少也莊生曰造化勞我以生佚我以老然則當勞當佚亦當不失時所宜矣

嵩山題字云登山有道徐行則不困措足於平穩之地則不跌余謂此語不獨登山卽馳逐世路可也世路最難行最多苦趣僧家取喻柰河橋其闊三寸其袤

數百丈兢兢而行可以濟渡若一失足則逢猛獸虎
豹豺狼啖食諸苦人行世路亦復如是不爭先不行
險以無事處事卽諸患不能入矣

世事支遣各有本末日用大小緊慢之事以公爲本以
私爲末以緊爲本以慢爲末有官守則以職事爲本
以寵辱爲末冠婚以人倫爲本醜妍爲末喪祭以哀
敬爲本豐儉爲末給身以飢寒爲本貧富爲末飲食
以食氣爲本腥膻爲末寒溫以布帛爲本綾縠爲末
九流百工伎業各以精藝爲本得失爲末寵辱衰樂
禍福一以委順爲本僥倖爲末至於談笑滑稽俳優

亦以譏諫爲本戲謔爲末善養生者持六運末而精神不竭不善養生者則汲汲於末忘其本始穿鑿人我無所不至矣

霞外雜俎載警身要語十五條漫錄於此一曰言行要留好樣與兒孫心術不可得罪於天地二曰毋以嗜慾殺身毋以貨財殺子孫三曰積金以遺子孫子孫未必能守積書以遺子孫子孫未必能讀不如積陰德於冥冥之中以爲子孫長久之計四曰留不盡之巧以還造化留不盡之福以與子孫五曰萬事隨緣卽是安樂法六曰但知義命在我不知勢利在人七

曰但行好事莫問前程八曰人有不及可以情恕非
意相干可以理遣九曰寧人負我毋我負人十曰與
其巧持於末不若拙戒於初十一曰莫使滿頂篷長
留轉身地十二曰不作風波於世上自無冰炭到胸
中十三曰平生不作皺眉事天下應無切齒人十四
曰爽口物多終作疾快心事過必爲殃十五曰一失
脚爲千古恨再回頭是百年人此皆人所常誦語一
經揭出便覺醒眼

顧文僖公吾鄉先達性閒澹敦本實近見其曾孫古雅
緝公自警聯云須知得宇宙內事皆已分內事則能

以方寸之心爲千萬人心聲色貨財意氣不遂樂矣而憂在其中利慾火牛宴安鴆毒也操修綜理日不暇給矣而逸在其中作德日休有備無患也事須盡出於已理必有遺善須博取諸人德乃可大事親若曾子輿纔成得一箇可多才如周公旦著不得半點驕悟塞上翁之論馬則事至而弗驚知百里奚之飯牛則物來而皆順貴人者心常不足修己者樂自餘不厚望於人則無怨惟自責於己乃有功家法無多能正身則能正事歲功不爽有東作則有西成儘前行者地步窄向後立者眼界寬立得正纔行得通

做得小方做得大直也如絃縱道邊夫復何憾比而得獸雖丘陵亦奚以爲以義處事義旣立而家亦有成以利存心利未得而害已隨至觀此數語處身處家無復遺理予當書紳

文僖公節錄陸放翁家訓數段公自跋云雨中觀水東日記有感因節其尤切於事者錄示子孫若向上事業則不止於此也其曰天下之事常成於困約而敗於奢靡又曰爲善乃士人常事今乃規身後福報若市道然此吾所深恥使無禍福報應可爲不善耶又曰常人之情見他人服玩不能不動此是一病但念

此物若我有之竟亦何益使人歆艷於我何補又曰
訴訟一事最當謹始使官司公明可恃尚不當爲或
官司雖無心而吏人佐使亦何所不至有是而後悔
之固無及矣鄰里所爭不過侵占地土逋欠錢物及
兇悖凌犯耳徐徐諭之可也李漢老作其叔父成季
墓誌云居鄉則以困畏不若人爲哲真達識也是皆
名言可以誦法

凡五十章

還奉養之真

人生衣食之外俱爲長物但人苦不自足耳余曾謁一

老僧號高峯者云一衲可支三四年一履可支數閱
月雖無營心不妨惟早間持鉢往市乞一鉢飯則大
事畢矣禪家有無事於心於心無事等語良有以也
吾儒若能存此一鉢飯心省許多勞擾以此守家可
以儉約而養德以此守官可以廉潔而全名

凡事須究本原衣取禦寒不必文繡食取充腹不必芻
豢宮室期於容身不必高廣棟宇期於適用不
必華美雕鏤既得其初復事美觀抑末矣君子求其
本不眩觀不侈美不耀飾諸事俱易簡矣易簡天下
之理得矣

事煩難治法苛難行求多難贍故功不厭約事不厭省
求不厭寡功約易成事省易治求寡易贍處身處家
以極於國與天下皆當服膺斯語曰不奪時之本
在於省事省事之本在於節用節用之本在於去驕
去驕之本在於心虛

工作室而我安其居耕刈獲千畝粒食女繅織而我
絲苧其衣人任其勞而我享其逸此其艱難安佚之
狀何遠殊也當思我生天地間享有是福德者當作
何功何德以報效君親酬答生民使百姓俱有衣有
食有家如杜子美所稱安得廣廈千萬間大庇天下

寒士俱歡顏者然後我之安居粒食絲苧之衣可以
無媿也不然逸居終日雖粗衣糲食茅茨有餘媿矣
常作是念者靡麗之想自然漸成調伏

天下器物本以適用今反以供目如宮室之雕梁畫棟
閨榻之羅綺文繡椅桌之黝堊丹漆盤盂之鏤簋朱
鉉似此之類不可枚舉適用之外更加美觀悅目天
地間增却無數工商增却無數費用廢却無限目力
今之士大夫肯於器物上只求適用不求美觀則天
下省費幾何何憂醇風不回富庶不致

居室取容身高堂廣廈皆剩物也余嘗愛梁徐勉戒子

書曰吾清明門宅西邊旣施與宣福寺不復方幅意
謂亦逆旅舍耳何事須華常怪時人謂是我宅古往
今來豪貴相繼迨其死矣知是誰室此語真達郭從
義造第洛中僅得秉燭一觀陳秀治第潤川惟得肩
輿一登西樓雖奢冠當時竟亦何益

文子曰亡國若不足存國若有餘有餘者非多財也欲
節而事寡也不足者非無貨也民鮮而費多也予以
爲惟家亦然君子所取者微所用者寡量腹而食度
形而衣勢利不能誘聲色不能淫節於已而用亦充
人之不善處已者反是

曹彬所居之宅僅庇風雨敗簷疎牖不堪其憂社祁公
不殖貲產退寓南都凡十年第宅痺陋范文正在杭
州子弟請治第公曰人苟有道義之樂形骸可外况
居室哉三公之意正同雖古今侈爲美談但士大夫
自宜稍飭里第使足容車馬稍置田疇使足供賓祭
然後爲得理若有意敝陋亦非中正陶潛謂方宅十
餘畝茅屋八九間樹柳蔭後園桃李羅堂前李德裕
謂清泉饒舍下修竹蔭庭除幽逕松蓋密小池蓮葉
初人生不可少此趣味

東坡在黃州嘗書云自今日已往早晚飲食不過一爵

一肉在尊客盛饌則三之可損不可增有召我者預
以此告之主人不從而過是乃止弗去又云儉有三
益一曰安分以養福二曰寬胃以養氣三曰省費以
養財朱文公晚年親書一帖戒其子云年來衰病因
酒色過度以致近覺肉多爲害尤甚丁巳正旦以往
早晚飯各不得過一肉如有肉羹不得更設肉飭如
是菜羹熟水下飯卽肉飭不得用大碟只用菜碟大
小一盤晚食尤須減少不肉更佳一則寬胃養氣一
則節用省財庶幾全生盡年儉德避難之萬一埜等
如有愛親之心切宜深體此意文公蓋祖蘇子之意

云然但酒色語文公於此不免敗闕

司馬溫公曰近日士大夫家酒非內法果殺非遠方珍
味食非多品器皿非滿案不敢會賓客常數月營聚
然後敢發書苟或不然人爭非之以爲鄙吝故不隨
俗靡者鮮矣此語與近年宴會之病同但宋猶豐盛
營聚可及今禮縟歲儉士大夫家力亦不及矣甚至
終歲不敢宴會禮似崇重而意實疎闊何以通慤懃
而敘情欵耶且仕宦者不聞政治之得失家居者不
知閭閻之利病其所係風俗非小

金溪胡先生九韶從吳康齋學易造詣修潔家甚貧課

兒力耕僅給衣食每日晡焚香謝天賜一日清福其
老妻常笑之曰一日三餐菜粥何名爲清福九韶曰
吾幸生太平之世無兵禍又幸一家骨肉飽煖無飢
寒又幸榻無病人獄無囚人非清福而何清江敖先
生云予爲童子時聞長者談此事輒笑之逮正德辛
未避華林之寇已而遭宸濠之變避難山中飢渴頓
踣至無所容身始信九韶清福之言良然今之優游
清福而不知者亦多矣

鹽院朱廷立作戒商九事一戒夤緣商人巧於射利拙
於守分饋送勢要意求囑託不知官司公道自不容

掩誰肯壞法任人驅使二戒鬪訟輻輳市井言語相
忤利之所在易相爭競因而鬪訟甚至破家亡身三
戒華居今制限庶人房不過三間不得爲重拱斗簷
丹漆繪畫四戒美服今例商賈止穿絹布不得僭用
紵絲綾羅婦女止許淺色母服大紅鷓青金繡線綺
五戒飾器今制庶民酒盞用銀餘器止皆銅錫瓷漆
女人頭飾止許金鍍凡翡翠金寶悉禁六戒多僕妾
度貲以稱事妻妾不三僕從不五治藏虛而矯飾者
七戒侈婚嫁幣聘止於紬絹茶菓必從儉素粧送止
許衾褥奩具勿爲華美八戒違葬祭親死半歲則促

歸葬踰期治以不孝葬惟明器旌布祭惟果肴醢醢
浮靡咸革九戒盛宴會淮商聚會務窮奢泰有終餓
溝壑者每會羹果不過數品酒數行噫豈獨戒商抑
亦可爲四民之戒也

人生資物以爲養耕食織衣所不可已特不當左右望
而罔市利於富貴之中有私隴斷耳不爲原憲之窶
是所以爲樂生也不爲子貢之殖是所以爲逸身也
窶則華冠縱履而杖藜安可以言樂生殖則滿身戚
醢而求益安可以言逸身是故君子貴治生而賤黷
貨

貨殖傳云貪賈三之廉賈五之誠哉是言也昔范文正公有鄰嫗晉謁苦貧甚公問汝何生理嫗對曰嚮糕曰日嚮幾斗曰日二斗所入幾何曰日入錢四十文曰汝今日蒸四斗而止徵二斗之入何如嫗如其言糕肥而價省人不之他所而之嫗不半歲大饒富今之逐什一之利者慎勿規近利哉

有友人謁湖州唐一菴先生顏色彫瘁問治生之術何爲而可一菴語之曰天生人以耳目手足能視聽行持此固天以治生之道付之足可自養人惟不肯勤渠盡耳目手足之用是以貧苦耳君第勿惰其四肢

當勿憂貧其人欣然謝而去後二年謁先生則已解
美無向貧窶色先生問之曰近年爲童子師朝夕勤
誨童子雲集賴此以充衣食吾人慎勿惰其四肢哉

凡十五章

還游覽之真

天地之間景物非有所厚薄於人人自有所順逆於景
方人當意適情順則景與心融情與景會而景物之
美若爲我而設一有不協則景自景物自物漠然與
吾不相關杜詩云愁眼看霜露寒城菊月花正謂情
不能與景協也雖則云然古之至人窮亦如是遠亦

如是順亦如是逆亦如是何景非真何物非樂何山何水何風何月非吾與人之所共適耶

世傳三十六洞天七十二福地皆好奇之士所願遨遊故有志游五嶽心希三島者每見不酬其志而死此皆妄心之所馳逐也君子安常處順不行險不履逆作德日休只是福地居易俟命只是洞天如彭澤所謂悠然有真趣欲辨已忘言如東坡所謂無事此靜坐一日是兩日現前悉成妙境又何事崎嶇奔走攀藤喘息而從之耶若偶值一山一水則不妨登臨又不可當面挫過

李德裕於平泉別墅採天下珍木怪石爲園池之玩有
醒酒石尤寶惜醉則踞之戒子孫云鬻平泉者非吾
子孫也以平泉一樹一石與人者非佳子弟也經黃
巢之亂有監軍得醒酒石德裕孫延古因太師張全
義復求之監軍忿然不與全義大怒笞殺監軍夫德
裕之留記延古之復求監軍之不與全義之杖殺可
謂四癡矣山石之爲祟如此哉

白樂天酷好遊觀形於吟詠有詩云留春不住登城望
惜夜相將秉燭遊又有詩云眼看筋力減遊得且須
遊如此之類不可枚舉然孰若列子所稱壺丘子之

遊壺丘子曰務外遊不如務內觀外遊者求備於物
內觀者取足於身取足於身遊之至也求備於物遊
之不至也然則壺丘子之遊其真善遊者與

嘗記堯夫洛下園池一詩洛下園池不閉門洞天休用
別尋春縱游只却輸閒客遍入何嘗問主人更小亭
欄花自好儘荒臺榭景纔真虛名誤了無涯事未必
虛名總到身讀此詩其胸中灑落可見矣記黃處士
一詩偶向東湖更向東數聲鷄犬翠微中遙知楊柳
是門處似隔芙蓉無路通樵客出來山帶雨漁舟過
去水生風物情多與閒相稱所恨求安計不同人生

可不營園林但不可無園林趣味耳

余過龍江登武安王廟慷慨悲歌徘徊終日而不能去
曰嗟乎悲哉天之困英雄固若此乎及觀留侯廟然
後收淚長嘯曰此固天之所以助漢也炎鼎方燃子
房狀貌僅如一婦人女子躡足附耳坐籌畫策而成
蓋世勳蹟功成身退見卓千古迺雲長以萬人之敵
卒困於奴隸之手則以漢燼旣灰有不能復燃者皆
天也非人也英雄于是可無遺憾矣

士夫多蓄古琴古書不若蓄古書可以資多識多寶奇
物珍玩不若蓄美藥可以備急用士夫多接星人相

士不若接賢達之士可以備咨訪吐握風遠求十一
於千百豈可謂盡無其人哉語曰與君一夜話勝讀
十年書信矣

凡百玩好皆能奪志惟文房之物差可羅致然古人有
嗜之成癖者殊可笑也昔東坡謂石昌言蓄李庭珪
墨不許人磨或戲之曰子不磨墨墨將磨子今昌之
墓木拱矣墨固無恙世間事如此類者多如聚珍玩
將以玩物不知爲物所玩一更數年復爲他有流散
無定何常之有人閱世而常新世何人之能故在高
人自能勘破嗚呼豈獨玩物而已哉

家蓄玩好不獨喪志亦有因之而召禍者吾鄉正德年間有名家蓄一古琴實未必奇也名聞於貴公貴公求之弗得其後罹之於法因囊裏戲貴公以示琴工工曰僞也聲嘶而弗越乃盛怒更搜括其家羅織之至破其產其人發憤而死嗚呼琴一物也有之不足以昭德私之適足以取禍然則尤物又安可專有哉古云匹夫無罪懷璧其罪

凡九章

推篷寤語卷之六

長洲吳曜書
雲間顧濟刻

推篷寤語卷之七

雲間李豫亨 元薦甫

訂疑篇

元薦氏曰今則信古則疑近則信遠則疑目則信耳則疑何者理有所未融也融之以理則百世一日也四海比鄰也而何疑於耳目之外哉竊觀萬物之變徵世風之會喜愕交前不能以無疑仰而思之苟裁之以理如冰之遇春如燎之遇颶庶幾哉其無留疑乎故有訂疑之述敢自附於思問之

義云

訂禮樂之疑

古之制位有貴賤故祀有大小而后土之祀自天子達於庶人以生者一也王者爲群姓立社曰大社自立社曰王社諸侯爲百姓立社曰國社自立社曰侯社大夫而下成群而社曰置社大社國社爲民祈報也王社侯社自爲祈報也大夫而下無民人莫爲立社又不得自立社故與民族居百姓之上乃立社以祈報之今國都至於郡縣皆有社獨置社止耳民人雖有春秋社祭然無壇壝主位然則社祭卽所以祭地

但有大小耳蔣道林先生謂帝王只郊以祭天社則便是祭地其說良然

古今官名國朝因置多有用以稱謂者卒未解其義漫考而著之司空昔禹作司空孔安國曰司壘主空土以居人按空穴也古者穴居詹事秦官掌皇后皇太子家應劭曰詹省也給也言給事太子庶子之職禮記曰古者周天子有庶子之官職諸侯卿大夫之庶子掌其戒令與其教理別其等正其位秦因之置中庶子官洗馬國語云夫差爲勾踐洗馬漢太子少傅屬官有太子洗馬太子出則當車者一人在前導威

儀蓋洗馬之義也祭酒後漢以博士聰明有威重者
一人爲祭酒韋昭辨釋名曰祭酒者凡讌饗必尊長
老以祭酒先故曰祭酒徐廣曰古人具饌則賓中長
者舉酒祭地示有先也太僕周禮有太僕下大夫二
人穆王命伯冏爲太僕正漢書百官表云太僕秦官
掌輿馬秩中二千石中書漢除挾書律文藉往往而
出竝藏之書府內有延閣廣內石渠之藏又御史中
丞在殿中堂蘭臺秘書圖籍又未央宮中有麒麟閣
天祿閣亦尚書劉向揚雄典校亦在禁中謂之中書
猶今言內庫書也桓帝延熹二年始置秘書監今以

中書爲善書之稱非也太史左傳曰天子有日官卽太史也漢書百官表司馬談爲太史令漢太史令一人掌天財星律祥瑞妖災凡歲將終奏新年曆而已今以稱修史之官非也修史自有史館史官著作郎及佐郎專掌國史刺史漢初丞相遣史分刺諸州武帝元光三年初置郡刺史掌奉詔條察諸州秋冬入奏後漢則屬官皆自辟除以刺衆官及萬人非違故古謂之刺史

今官衙之庭除率曰丹墀未詳所始漢荆尚書郎主作文書起草更直於建禮門建禮門內得神仙門神仙

門內得明光殿神仙殿因得省中省中皆胡粉塗壁
畫古賢列女以丹漆地謂之丹墀尚書郎握蘭含鷄
舌香奏事與黃門侍郎對揖黃門侍郎稱已聞乃出
則丹墀之名厥有所自

唐制謚議之法無爵者稱子若蘊德丘園聲實明著雖
無官爵亦奏聞賜謚曰先生今三品以上乃得謚號
而無爵之謚遂絕予以爲純白之士雖不得出仕者
仁朋義友孝子順孫循其行實私爲加謚義無不可
又唐碑碣之制五品七品以上立碑若隱淪道素孝
義著聞雖不仕亦立碣今無爵者法不得立碑但立

石紀歲月不螭首龜趺亦無傷也

凡生曰父母凡死曰考妣其義云何考者歲也言其德行之成妣者媿也言其媿助於考也高曾祖下亦加考妣字祭先之禮士有田則祭無田則薦有牲曰祭無牲曰薦大夫牲用羔士牲特豚庶人無常牲春薦韭夏薦麥秋薦黍冬薦稻韭以卵麥以魚黍以豚稻以鴈取其新物相宜今人鮮用牲惟設庶饌而已

奠鴈古禮也詩云嚶嚶鳴鴈旭日始旦士如歸妻迨冰未泮鴈冬北春南親迎執鴈取順陰陽往來天時人事同和也程謂鴈取不再偶之義竊恐未得古禮之

義蓋古人重冠昏皆以士而用大夫車服不以爲僭
大夫相見執鴈昏禮旣以士而服大夫之公服乘大
夫之墨車則相見婦翁不得不用大夫之贄禮執鴈
乃士用大夫贄見之禮於昏姻之人也士宜執鳧羹
執大夫之鴈取其攝盛也若謂親迎之始遂期其將
來如孤鴈失不再偶可爲祥乎冠禮三加幘頭服公
服革帶納鞞執笏與此同義

奠酒之奠謂安置也奠酒則安置於神位前旣謂之奠
而乃自燒香酌酒則非奠也奠而有酌者初酌酒則
傾少酒於地代神祭先代始爲飲食之人蓋古者飲

食必祭今以鬼神自不能祭故代之祭耳今人直以
奠爲酌而盡傾之於地非也古用鬱鬯灌地以降神
謂求神於陰陽有無之間故酒必灌於地惟天子諸
侯有之大夫而下只是代宗先祭酒也

道林先生雖不屑藝數之學其於天文地理星歷律算
諸子百家往往能涉其大概謂春秋一經皆魯史舊
文孔子特取其繁亂者刪之褒貶自明初不假於傳
註謂古帝王只郊以祭天社則便是祭地園丘方澤
之說非古后世分合之說亦俱失之此則直破漢儒
附會之陋訂千古不決之疑窮經者知此可謂見卓

千古識度前賢矣

魯論云鄉人儺朝服而立於阼階鄉儺之義何取稽之
月會云季冬日在婺女是月命有司大儺旁磔註云
季春惟國家之儺仲秋惟天子之儺此則下及庶人
又以陰氣極盛故云大儺也旁磔謂四方之門皆披
磔其牲以攘除陰氣不但如季春九門磔攘而已舊
說此月日經虛危司命二星在虛危北司祿二星在
司命北司危二星在司祿北可中二星在司危北此
四司者鬼官之長又墳墓四星在危東南墳墓四司
之氣能爲厲鬼將來或爲災厲故儺磔以攘之此聖

人之創制有難概以誕妄議者竊謂季冬時方隆寒陰氣瀰漫虛空無處不遍故爲儺以祛之且時將向春陽氣欲至故先爲是以驅除之耳此聖人扶陽抑陰之精意也

古人律呂之法最精故聞聲可以識治亂吹律聽聲又能望敵而知吉凶聞聲而決勝負故云六律爲萬事根本今之樂工但知樂數不知樂音君子又以爲器數之末不知審習古樂愈邈師曠曰吾歌北風又歌南風南風不競多死聲楚必無功嗚呼元聲在天地間未嘗止息師曠不作元聲其遂亡乎

候氣之法大抵因室縵周密地氣上升無所從出則從管之疏漏處滂然上升氣至灰飛初非擇何管應何律而後出譬如炊飯氣盛則乘疏旁出亦非擇何竅而後升也但以此法候氣應律則可若欲多截竹爲筒實以葭灰伺何管灰飛則爲黃鍾恐無此理惟黃帝始使伶倫取嶰谷之竹斷兩節間而吹之以爲黃鍾之宮是爲律本此則千古不易之法前律歷志云截管爲律吹以考聲列以物氣律之本也噫得之矣

凡十一章

訂名物之疑

世人以常有者爲真以常無者爲妄故聞習於常存而
置疑於暫亡昆吾之劍火浣之布西戎之所獻也皇
子局於耳目之見聞而不能博通於物理之變遽以
爲無此物而傳之者妄後皇子而生者率駭所未聞
見其能不果於誣理者幾希矣

雷乃天地間聰明正直之氣所發洩故謂之雷神既有
神主其間則雷鼓雷斧之屬自然種種有之此氣聚
而成形也嘗記蔡季通云人於雷所擊處拾得雷斧
是一氣擊後方始結成不是將這箇來打物然余曾
見太學董紫岡者迺祖御史公綸初宰上饒邑邑民

俗爲大斛小斗以罔利公治之嚴有一民行使如故
一日雷攝斗斛于縣廨庭中以斗置斛內兩無所損
擊其人斃于傍其斧并楔爲石所礙盤旋不得入地
乃祖得之斧狀似黃石楔如世銅所造藏於家近燬
于倭可見非擊後始結成也不特如此雷有異甚者
先公海樓任山東時夜聞迅擊聲烈甚各官舍皆驚
起明旦訊之迺一兄弟合夥生理弟私其財且匿記
籍雷攝弟跪於庭手擎籍擊而斃先公又言少時有
一人沈姓者以算術搬弄田塍爲姦有年一日雷擊
之斃手擎冊籍把筆作書冊狀一如上云

珠以一顆重一錢者爲至貴古云一顆錢價千兩近
朝廷懸價求珠名珠屢有至者一錢者間有聞一顆
計重二錢五分索價五百兩底少區其粗如彈見者
謂頂亦披青但光如常珠未見其異余以爲珠之所
貴重在於照乘若光不照乘則亦常珠耳雖巨何益
古云夜光之珠所重在光也故馬雖八尺不千里人
雖魁偉不百鈞亦何足稱其德與力哉

玉出璞中人則知之非獨玉也水晶瑱瑱瑪瑙亦出石
中惟珊瑚枝出自海底珠出於蚌亦不易致可見天
地間物凡至精者必有至粗者以爲之鄴鄂有至美

者必有至惡者以爲之胚胎蘊蓄潛藏韜晦收斂避
迹韜光求不爲人所羅致然後得以全其爲寶若不
得已而爲世搜取然後出爲世用如自衒自鬻非惟
不足爲寶人亦不以寶視之矣此夫子所爲蘊匱而
藏也非獨真玉卽似玉者如保定之琳石亦出石中
詩曰他山之石可以攻玉

石雖至堅可嚼而碎余嘗道遇道者以一草葉裹少石
及少藥授人入口嚼之齏碎余取試之則石入口漸
漸嚼之漸漸細如粉雖無甚味咽之亦無所苦以此
知古人所稱白石可爛及歸來煮白石之語亦自不

妄大都是仙家辟穀之術耳未必成仙古又有和玉屑服者云可長生若以烹石之理推之亦不過能使筋骨化爲玉石視諸物差可久耳仙無成理

白者金精最爲精粹霄壤之間凡寓形宇內者皆有白之一種如白兔白鹿白狐白龜白蛇白鴈白鼠白虎白鸚鵡白猿白狼白狸之類大抵此類獨少殊不易得又色白者眼多赤惟此與其類異初非本爲別色既久而後變爲白亦非類中之白其物獨壽也相傳之說謬矣人亦有白者今人謂之社日生是已然何嘗是社日生亦不見其壽考與衆獨異則其鳥獸昆

蟲之白者亦非壽徵可見矣舉此以破世惑

天地間物有不可以理曉者吾松海陬有地名三沙者
其一蜺砂岡袤亘數餘里掘地皆蜺沙丈餘不知上
古何以聚蜺沙之多如此又如七里灘之驚卵石水
底皆卵石歲有取者不見其損豈皆鑿山之遺耶此
猶水底也水流而光潤理尚易知若金陵雨花臺諸
山卵石遍地愈掘愈有不知諸山何以有是碎石而
又皆成卵也其餘不可曉者尚多姑記一二於此
凡物浮於水上者性多涼生於水中者性多熱生於水
底者性多溫草木如蓮實性涼芡實性熱藕在地中

性溫魚蟲如海蜚河賊之屬性涼赤鯉河魴之屬性
熱鯽魚鱖魚藏在土中性溫此因其所處而變其性
也北方地高人性多寒南方地卑人性多熱亦類此
予嘗舉似一疑曰油乃水類水能克火何以傳火則燃
人不能對曰此同類之所以合體居也油乃菜豆椿
麻草木之液蠟魚羊牛禽蟲之膏皆火之類其性極
熱故能傳火而燃如燒酒醖酒竹木之類皆能燃灼
亦與火同類故耳若油爲水類火遇之且熄矣豈能
焰焰而敘弗絕耶善觀物者當必首肯

飛者棲木食木鷹鷂之毛猶木也走者棲草食草虎豹

之毛猶草也飛之類喜風而敏於飛上走之類喜土而利於走下在水者不瞑在風在地者瞑走之類上睫接下飛之類下睫接上牛順物乘風而行則順馬健物遡逆風而行則健魚逆水而上鳥向風而立蟲陰物行必北首蟹海族行必東首鳥之雄者以左翼掩右鳥之雌者以右翼掩左又燒毛納水中沉者是雄浮者是雌非獨物也男生而伏女偃其軀陽氣聚面故男子面重溺死必伏陰氣聚背故女子背重溺死必仰此皆陰陽之氣定制始先善觀物者能識陰陽則其理迎刃而解

陽在上陰在下陽多小陰多大世稱鰲鯢爲海宇間最
鉅物然鰲世不常見鯢魚時時有之此因大海勢最
卑氣屬陰故也地之所產則惟交象爲最鉅交象之
外更無鉅者視海稍高其生亦稍小若冲霄凌漢者
鶴鶴鵬鴈之外無聞也視地更高其所生尤小勢亢
而氣陽故耳因此可以識陰陽大小之辯

水族陰類也故見火則聚從陽氣也蟹與螭略見火
光則舉族類聚遂爲漁父所得人皆知之魚亦好火
光但隔水不得見則不聚以法制火入水中則羣魚
見光相附而至可舉群得也予恐世人傷殘物命故

不書其法而特論著其理如此不獨此也凡蟲蚋之類夜出者皆陰類性亦赴火如蚊蟲螻蛄燈蛾青蟲諸類是也推而廣之鬼亦陰類亦好火故享神鬼雖晝亦燃燈爇香從所好也母乃亦此意與

王元之蠡記云兔和寺多蠡僧爲予言之甚具予愛其王之無毒似以德而王者又愛其王之子盡復爲王似一姓一君上下有定分也又愛其王之所在蠡不敢螫似法令之明也又愛其取之得中似什一而稅也頃又見楊文貞公作義蠡記云蠡擁王子出爲童子所殺蠡竟淆亂不五日盡死夫以德而王分民而

居號令嚴明賦斂得度且首領亡則俱死不復事他
姓若盜者亦可謂善國矣

山氣多蠅水氣多蚊故固原宣府大同諸鎮多蠅每宴
會必加罩於鼎俎以三關俱崇山故也邵伯寶應多
蚊故有烈女露筋之跡以楊越巨浸故也又有限於
地氣者如江南無蠍虎江北鮮蜈蚣以蠍虎多喜燥
而蜈蚣不畏濕也又有局於地產者如東廣富巨蛇
北虜多貂鼠以東廣地熱而蛇種蕃北虜地寒而毛
溫厚也此類未易縷數但倣此推之似可懸解

鴈北歸必銜蘆越關則輸之淮南子以爲鴈愛氣力銜

蘆以避矰繳俗傳以爲過海投蘆爲桴以息氣力或云輸蘆以供稅供稅之說誕矣過海爲桴之說何秋來獨無而春始蘆耶蘆避矰繳之說不知來時何以爲避且使上林射鴈蘆何能避耶予考鴈從風而飛春夏南風故北飛秋冬朔風故南飛秋冬過南食肥體重故借蘆以助風力耳塞北風高則無事此故投於鴈門關姑識之以俟明者焉

水緩則流直水急則流曲所以江水直河水曲有由致也非獨江河卽小江小河凡緩者皆直急者皆曲直者徑直而流易曲者迂迴而流難今堪輿家水喜曲

而惡直者正謂水曲則流環抱而有情也黃河之水
縈迴九千里利濟冀幽并燕青齊諸方者曲故耳此
可見雖由天造其寔由水性之自然也

凡物一凝定必清者在上濁者在下只如流水之爲物
其體方動然亦分清濁大江大河其在上輕清者多
流動其在下重濁者多止而不流惟陡瀉者流至徹
底其餘止在水面流行耳余嘗試之失物水次苟非
大輕浮者多在水中經日不離故處故知水近底一
段多是不甚流行李德裕取水江心一嘗卽知其非
真江心水正爲水不流動若卽上流水經過何能遽

辨其味之真的耶此語似不曾經古人道出

鹽本煮海而成然有不盡出於海者有井山池木石種
類匪一井則劒南西川井凡八百二十二隴西有西
河縣鹽井漳縣鹽井及今滇南井二十餘山則永康
軍之崖沈括筆談謂鹽生於土崖之間池則冀之河
東有鹽池長五十里廣六里周一百一十四里又安
邑一池東西二十五里南北二十里晉陽雲中鴈門
渤海俱有鹽池靈州有七池慶陽有大小二池會州
一池寧夏衛有二大鹽池一小鹽池東牟有鹹泉池
五原有四池而石與木則皆胡地女貞國鹽生木枝

上淳泥蘇祿彭亨暹羅亦有鹽海西方鹹地堅且鹹
卽出石鹽湯口域有石鬻以爲鹽水竭鹽成甘水有
石鹽噫鹽日用物也尚有不能究知者又安能疑於
耳目之外哉

物性不同有不可常理測者如鐵非養生也而有食鐵
之兔便鐵之貊齧鐵之獸火遇則化也而有餐火之
雞浣火之鼠不灰之木又有火王辟寒犀寘之室內
則不復挾纊又有龍鬚布冰蠶繭絲張之几筵則滿
座涼生西戎獻切玉之刀十洲獻起死之香人無以
聞見之隘而盡疑耳目之外也然非特耳目之外卽

耳目所覩記亦有不可知者如溫泉火井鹽池等類是矣君子當知穹壤之間何所不有人知見自小不能及耳

指南車舊傳周公所作越裳氏重譯來獻使者迷其歸路周公錫以輶車五乘皆爲指南之制越裳氏載之周年而至其國秦漢其制無聞後漢張衡始復創造漢末其法不存魏明帝始令博士馬鈞造之晉亂又亡石虎使解飛姚興使令狐生又造宋武平關中得之其制如鼓車設木人於車上舉手指南車驟迴轉所指微差至齊祖冲之又造之今鹵簿中亦不復聞

矣世所用惟術家鍼盤用水浮鍼視其所指以定南北近年吳越閩廣屢遭倭變倭船尾率用旱鍼盤以辨海道獲之倣其制吳下人始多旱鍼盤但其鍼用磁石煮制氣過則不靈不若水鍼盤之細密也

列子稱二小兒爭辨一兒云日初出時如車輪其中時如盤盂此不爲遠者小而近者大乎一兒云日初出時蒼蒼涼涼及其中時如探湯此不爲近者熱而遠者涼乎孔子聞之不能決予謂人之目力矚旁則大而矚高則小嘗試觀小兒風箏竟其繩而放之旁則望之形大及竟其繩而颺之頂則望之形小物非有

大小也目力有難易也初出如車輪中時如盤盂豈
初出近而日中遠乎火性炎上日性炎下故置物於
火之上則焚置物於日之下則燥日行南陸日照南
故冬日可愛日行北陸日照頂故夏日可畏日初出
蒼蒼涼涼以日之照尚在東日中如探湯以日照下
正在頂豈近者熱而遠者涼乎中國當天地之中人
生當四旁上下之正中日月行度初無遠近列子寓
言以玩世耳何難決之有

吳人呼疾速爲飛風未詳所始唐制凡緹馬次馬送尚
乘局者於尾側依左右開印以三花其餘雜馬送尚

乘者以風字印印右臍以飛字印印左臍然則飛風二字蓋取義於馬耳

世有兩字而呼爲一字者如衡衡爲衡舅母爲姁者乎爲諸不可爲叵之類有諱惡字而呼爲美字者如傘諱散呼爲聚立箸諱滯呼爲快子竈諱躁呼爲歡喜之類今因流傳之久至有士夫間亦呼箸爲快子者忘其始也故知中原音韻與北溪字義六書精蘊諸書暇中留心一考亦博物之助

凡二十三章

訂文史之疑

予嘗謂國子學正梅鶯語予曰尚書惟今文四十二篇傳自伏生口誦者爲真尚書古文十六篇出孔壁中者盡是漢儒僞作大抵依約諸經論孟中語併竊其字句而緣飾之其補舜典二十八字則竊易中文明詩中溫恭允塞等字成文其作大禹謨后克艱厥后臣克艱厥臣等句則竊論語爲君難爲臣不易成文惟精惟一允執厥中等句則竊論語允執厥中等語成文征苗誓師贊禹還師等句尤爲無謂大禹原無此事舜分北三苗與竄三苗于三危已無煩師旅僞作者徒見舜典有此文遂模倣爲誓召還兵有苗格

諸語益稷賡歌亦竊孟子手足腹心等句成文其外
五子之歌竊孟子忸怩之語泰誓三篇取語孟百姓
有過在余一人若崩厥角稽首之文其外胤征仲虺
之誥湯誥伊訓太甲咸有一德傳說武成諸篇文多
淺陋必非商周之作相傳共王壞孔子宅欲以爲宮
而得之不知竹簡漆書豈能支數百年之久聞絲竹
八音之聲壁間是何人作俱爲誕妄乃獻書者之飾
辭也梅作有成書不知今尚流傳否其言殊有理聊
記於此以俟知者辨焉

禹貢揚州三江旣入釋之者曰松江下七十里分流東

北入海者爲婁江東南流者爲東江併淞江爲三江
余謂此註誤也當周之初尚謂吳中謂荆蠻斷髮文
身未通中國禹貢止稱島夷卉服而已況禹貢法費
疏鑿者雖小必書今松江之水入海未嘗費疏鑿也
何舍大江入海而特書松江也此蓋誌大江之入海
東爲北江東爲中江併大江經流爲三江耳隨山之
文已自明載今北江中江俱未見故跡意當時洪水
方平水未歸一荊州之江尚分爲九揚州之江則分
爲三今始歸於一耳謂九江爲洞庭者亦非

學庸語孟千古人人盡讀亦有承襲之誤者如大學缺

格物致知之釋近時諸公欲移知止而後有定二節
附於聽訟吾猶人也之下以補之而以古人明明德
節直接在止至善之句甚爲直截足稱全書如論語
羿善射彘盪舟俱不得其死爲句不當如由也不得
其死然例而併以然字屬上句蓋由也未然而羿彘
則已然也如孟子馮婦章卒爲善爲句士則之又爲
句不當以卒爲善士爲句而以則字屬下不成文字
如齊宣王見孟子於雪宮當是宣王引見孟子於雪
宮非是宣王往見所以孟子以游觀事告之以宣王
在離宮游觀故也其問賢者亦有此樂乎與梁惠王

之問同而今解謂孟子館於雪宮而宣王以辭色驕
之切恐未然聊誌數條於此明眼者辨之

南渡之不振雖君臣之偏安實由時勢有不得不然者
高宗旣渡江南勁兵盡失所恃者浙福兵耳以浙福
兵支遼金燕雲之兵其勢誠難況金帛括獻兀術國
藏空虛高宗積貯數年不足支賞軍三次何以供恢
復之費使韓岳諸臣乘勝逐北一爲敗衄然後興師
南渡問罪臨武林而陳則高宗無置足之地矣況康
王往質金時因善騎射以爲將家子非徒區區庸懦
者晚年失攜拄杖令兩小黃門舁至僅乃勝之視之

乃精鐵所成由此觀之高宗至老年猶未嘗忘恢復但勢力不能耳其時值金世宗仁厚立國不欲深入宋地故僅僅以江爲守若銳意南征崖山之辱豈在少帝哉高宗君臣於此計之熟矣但不宜枉殺岳武穆遂爲千古忠義之恨渡江後諸捷不足多也

予讀元結惡曲惡圓二論曰嘻固哉元子之立論也其惡曲論云未嘗曲氣以轉聲曲辭以達意曲步以便往曲視以回目不曲臂以取物不曲膝以便坐其惡圓論云寧方爲皂不圓爲卿寧方爲汙辱不圓爲顯榮甚者終身不仰視曰吾惡夫天之圓夫古人曲學

以附世固來汲黯之譏而易有曲成之文禮有物曲之利孔樂由肱子思致曲則曲亦君子之所不廢也如葦如脂固來屈子之憤然易稱圓神禮著毀方內欲圓而外欲方知欲圓而義欲方則圓亦君子之所宜尚也惡曲惡圓固哉元子之立論也

日食易曉而月蝕難曉天之運行曆家以爲右旋蔡氏以爲左旋海潮進退其端何從日月光照有限其無日月處假何象以照之如所謂燭龍銜日者未審有無天地之體有限世所傳海外諸國相去數億萬里之遙天地混沌相去幾億萬年如康節元會運世之

說六合之外更有何物何所窮盡此皆不可以理測者緣人身撮爾微軀其知有限自不能周知至遠聖人存而不論可也譬如蟲中螻蟻浮游咫尺間雖竭其知欲知吾人禮樂揖遜几筵冠冕之煩縟必有所不能及矣

丹書曰五行順行法界火坑五行顛倒大地成寶夫地至廣大何以能成寶也蓋五行相生俱自土中而形見于外故生金生水生木生火而坤土之氣遂洩如水不外流而藏體于金火不外颺而藏體于木金木交併復歸真土則氣不散逸爲人物爲草木禽蟲而

堅固不散盡成黃金氣不敗朽矣故曰遍地俱黃金
也知此人能內固精神不外施用身中三寶亦如金
之不敗朽矣其長生久視也奚疑

劉文靖公嘗謂學詩到李杜亦只是兩箇醉漢今見人
有吟聯琢句動經旬日何爲也哉嘗謂亘古今來凡
有一技古人已到至處如字于晉詩于唐已無餘恨
今不過步其後塵況猶不能不貽昔賢之誚乎學人
須於自性中理會有光風霽月氣象不妨吟風弄月
以歸

昔人論司馬子長之爲文曰子長生平喜遊方少年自

負之時足跡不肯一日休故其所得於萬物之變可
驚可愕可以娛心使人憂使人悲者盡取而爲文章
是以變化出沒如萬象供四時而不窮殊不知古今
好遊者豈獨子長一人哉而率不能入其閭域則其
奇偉跌宕之氣有不易及也且其遭李陵之難發憤
舒懣洩之於文非尋常操筆弄墨者可比語有之醉
把杯酒可以吞江南吳越之清風拂劍長嘯可以吸
燕趙秦隴之勁氣其子長之謂夫子長而後至唐而
有李太白以風浪逸其情乾坤維其志以虹霓爲絲
明月爲鉤將進酒問月諸篇天才跌宕差可與子長

比肩

顏氏家訓曰士大夫恥涉農商羞務工技射旣不能穿
札筆則纔記姓名飽食醉酒忽忽無事以此銷日以
此終年或因家世餘緒得一階半級便自爲足全忘
修學及有吉凶大事議論得失蒙然張口如坐雲霧
公私宴集談古賦詩塞默低頭欠伸而已有識傍觀
代其入地何惜數年勤學長受一生愧辱哉宋世范
純仁言於朝欲於公卿家子弟有無出身人分位上
帶左右字以分優劣寓意獎勸尤得成就人才之體
百世小人知讀論語孝經尚爲人師雖千載冠冕不曉

書記莫不耕田養馬若能家保數百卷書終不爲小人也由顏氏家訓觀之可見人家不可輕絕讀書種子雖然尤在祖宗積德無徒恃數百卷書可也應笑世人偶以仕途罹禍則令子孫無得讀書噫人之禍患卽業農亦未必無之豈獨仕宦哉

文裕嘗語人曰文字當各寫胸次落筆成家如江河之潤日月之行乃可傳後近多繩趨尺步於一句一字摹擬曰吾學班馬吾學韓柳左矣故公有一札云過於摹擬頗傷骨氣昔宋時有優人誚館閣者衣破碎之服揚言於衆曰吾李義山也爲三館諸公所牽擗

至此今日文選杜詩亦可謂牽掎盡矣公文章家語有深旨漫著其說

張于湖序史警曰故人談獻可自黃州破浪來迎握手命酒相勞苦出史警十餘篇相示純正剴切得古人論議所未到范曄論撰書之意曰吾文之傑思殆無一字空設此書行應有知音者張鏡與顏延之鄰居鏡與客談延之從籬邊取胡牀坐聽曰辭旨清玄彼有人焉噫身在貧賤爲天下所不知獨見知於大賢乃可貴耳然范曄諸君闔戶著書出門而遇同人抑何幸也後世有子雲孰若當世有子雲哉

辨晰衆理人出臆見以求勝是非蠡起此殆非也當知
理本一致見寔殊途譬如人面不同豈得一一如已
君子據理探微著之簡策以待知者理苟無舛必有
後世子雲金匱之好矣若人不我知則亦安之而已
而又何足憾乎知者一人勝如十人知者十人勝如
百人故老子有云知我者希則我者貴

謝眺好獎與人才曾稽孔閨粗有才華未爲時所知孔
珪嘗令草讓表以示眺眺嗟吟良久手自折簡寫之
謂珪曰此子聲名未立應共獎成無惜齒牙餘論秦
少儀好爲詩初不甚工旣而以所業見山谷山谷贈

以詩當時以爲許與太過然少儀緣此詩思大發遂
得與少游齊名夫蠅蟻之微附騏驎而致千里間巷
之人附青雲之士而施後世烏可不察哉

文徵明之祖文洪所著有括囊集偶閱其下第四丹陽
詩京塵漠漠染欄衫依舊書生跨蹇還防虎夜投淳
化鎮聽雞朝度句容關僕夫已熟驅馳事道路爭看
困悴顏六悞科場垂廿載鬢毛那得不斑斑言懷詩
十年書劒屬飄零憔悴青衫太學生有子策名粗畢
願衰年隨計未忘情風塵欺鬢蕭蕭短雨雪侵衣漠
漠輕爭似歸來故鄉好西山自買薄田耕予六度場

屋正與詩同諸子但粗解文義未有策名者此則有可媿耳

凡十六章

訂遐方之疑

天地之大雖曰無垠然日月經行之內則自有限量中國疆域萬里之外東爲朝鮮朝鮮界二千里而瀕海南濱於海西南則爲安南一千九百里而至占城南占城之南亦瀕海其外海中諸國不過中國一大縣耳北則沙漠出邊城之外二千里已南望北斗又二千里則不可窮知其國度西則西域諸國天竺而

外則爲波斯大食亦不過五千餘里而止耳今觀中國北燕南越暑寒頓異更極而南則九真日南其熱尤甚更極而北則邊徼之地寒不可禁則昔人所稱日月經行三萬里者似非誣也人所聞見狹故荒遠之說得肆行耳

天下之水莫大於海萬川歸之不知其盈海信大矣然自朝鮮起至占城而西濱海之地可數而計也其袤不過萬餘里巨海之外其徑雖風迅不常難以里載然大約東至扶桑南至峽門西南至馬安諸國各不過萬餘里而止耳扶桑日出之地沙弼茶國日入之

地故予謂日月行度三萬里之說爲足徵信云

淮南子地形訓言闔四海之內東西二萬八千里南北二萬六千里禹乃使大章步自東極至於西極二億三萬三千五百七十五步使豎亥步自北極至於南極二億二萬三千五百七十五步此雖荒誕無稽大抵假寓言以自實其所稱之說耳東西南北之極舉其成數蓋不出三萬里云何以明之昔周公以土圭測天地之中定豫州爲中東西南北各五千里朱子以爲此指中國地段而言今近東之地自是多風如海邊漳泉諸郡極多風如西北多陰非特山高障蔽

之故西邊不甚見日方午則彼已甚晚不久卽落故
曰蜀之日越之雪以日月所照及寒暑風陰驗之可
見天地不甚遼廓至中國之外雖不可以道里計然
以中國驗之其外亦不過萬里其氣候已極而變窮
矣曆家所傳四遊儀謂春夏秋冬四方上下各遊三
萬里者其術雖合其所稱道里之數則構妄不經矣
中國疆宇東起朝鮮西至嘉峪南濱海北連沙漠道路
行縈東西徑萬餘里南北袤亦萬餘里云嘗考東界
朝鮮朝鮮之境東西二千里東瀕海則朝鮮之外亦
濱海也西至嘉峪自嘉峪而西南則爲西域河源葱

嶺天竺在焉南濱於海海之南則爲安南占城佛齊
邏羅東則爲日本東南則爲大琉球西南則爲淳泥
西洋彭亨諸夷北連沙漠則九邊之外東爲會寧府
則金上京與女直相鄰地北爲舊開平則元上京越
沙漠爲威虜鎮殺胡鎮 成祖北征所至之地南望
北斗北則爲和寧元初建都於此自和寧北行四千
餘里則爲大澤又東則爲北狄云此宇宙內疆域之
大略也若夫齊諧之說所稱道里遼邈率多荒唐君
子所不道矣

國朝區宇遠逾前代聊誌古今沿革大略於此京師古

幽薊地左滄海右太行北居庸南河濟古稱天府之
國遼金元嘗於此建都我太祖時爲北平布政司
成祖龍潛於此及繼大統遂建北京其時猶稱行在
正統中始稱京師云南京古金陵地周末時已有王
氣秦始皇謂東南有天子氣諸葛亮謂龍蟠虎踞真
帝王都卽此吳晉宋齊梁陳及南唐嘗於此建都我
太祖乃定鼎於此山東古青兗二州地漢於青州兗
州各置刺史唐宋因之東西分治元始合爲東西道
宣慰廉訪司山西古冀州地漢分冀西境置并州部
刺史唐置河東道宋置河東路元置河東山西道宣

慰廉訪司陝西古雍州地漢都於此置司隸校尉領
三輔置涼州部刺史唐初置關內道已而置京畿關
內隴西南平等道宋初置陝西路後置六路元置陝
西行中書省及陝西漢中道廉訪司甘肅等行中書
省及河西隴北道廉訪司我朝始合爲一置陝西
布政司而設行都司分治甘肅云河南古豫州地漢
置豫州刺史唐置河南道開元中置都畿河南河北
三道宋都汴置京東東西二路元置河南江北行中
書省廉訪司我朝置河南布政司浙江古揚州地
漢會稽郡兼統兩浙隸揚州部刺史唐貞觀中隸江

南道後增置江東道宋初以兩浙爲一路後分浙東西爲兩路元置江浙行中書省及浙東浙西二廉訪司我朝合兩浙置浙江布政司江西古揚州地漢領以揚州部刺史唐隸江南道後分爲江南江西道宋置江南西路元置江西行中書省及江西湖東道廉訪司湖廣古荊州地漢置荊州部刺史唐貞觀中領以江南道後增置十五道宋置荆湖南北二路及京西南路元置湖廣行中書省及江南湖北道荆湖北道山南江北道湖廣道嶺北湖南道宣慰廉訪司我朝合置湖廣布政司四川古梁州地漢置益州

部刺史唐貞觀中置劔南道後置劔南并山南東西
道宋爲四川路後分東西兩路又分益慶利夔四路
元置四川行中書省及置西蜀四川道廉訪司福建
古閩越地漢以揚州刺史領之唐初隸江南道復隸
江南東道大曆中始置福建觀察使宋置福建路元
置福建行中書省及福建宣慰廉訪司廣東古百越
地漢置交州部刺史唐貞觀中置嶺南道後分爲嶺
南東道宋置廣南東路元置廣東道又置海北海南
道宣慰廉訪司隸江西行中書省我朝改置廣東
布政司廣西古百粵地漢領於荆交二州刺史唐以

其地隸嶺南道後分爲嶺南西道宋屬廣南西路元置廣西兩江道及嶺南廣西道宣慰廉訪司俱隸湖廣行省至正末置廣西行中書省我朝因之雲南古梁州南境爲徼外夷地漢置益州郡領於益州部刺史自唐至宋爲蒙氏段氏所據元置雲南行中書省及廉訪司又置曲靖臨安大理金齒等處宣慰司貴州古西南夷羅施鬼國地元於此置八番順元等處軍民宣慰司本朝洪武初以其地分隸湖廣四川雲南三布政司永樂十一年始置貴州布政司今兩京畿內郡縣俱隸京畿而設布政使司者蓋十又

三云

以二十八宿分屬 國朝之郡縣角屬河南之開汝亢
如之氐屬汝尾屬北直隸之順河真保永隆萬箕屬
順河保斗屬南京之應天鳳蘇松常鎮廬安太寧池
徽廣和滁陽淮浙江之杭嘉處湖溫江西之吉瑞袁
臨撫建南康廣饒南昌南安贛九江牛屬中鄴之揚
淮江西之九江浙江之溫湖嚴金衢紹寧台福建之
福泉延汀興邵漳廣東之廣南肇高雷瓊惠福建之
梧女屬廣東之廣南肇高雷瓊惠福建之建福泉延
汀興邵漳浙江之溫嚴金衢紹寧台廣西之梧州屬

山東之青危屬山東之青濟登萊東昌室屬山東之
東昌北直隸之大名河南之彰衛懷奎屬兗州婁如之昂屬北直隸之
大名河南之彰衛懷奎屬兗州婁如之昂屬北直隸之
之順德廣平真保定山西之大同畢屬北直隸之真
保山西之大同冀屬山西之平澤四川之松潘疊溪
參屬山西之平陽潞澤汾遼大原貴州四川之順慶
松潘疊溪井屬貴州普安四川之成都保寧敘潼眉
嘉瀘雅永龍順慶天金陝西之西鳳漢平鞏臨慶延
寧洮文雲南之臨楚徵曲武山西之大遼解鬼屬陝
西之西鳳漢平鞏臨洮慶延寧洮文四川之馬雲南

之臨楚徵曲武貴州之普安柳屬河南一府星屬貴
州銅仁張屬河南之南陽翼屬貴州之黎平廣西之
平南慶潯柳桂廣西之廉四川之夔湖廣之彬安沔
永辰常衡長岳荆黃德襄武陝西之漢中軫屬四川
之平夔陝西之漢湖廣之靖武襄德黃荆岳長衡常
辰永沔安彬廣東之廉廣西之桂柳平慶予觀分野
之說如上所屬有一星而屬數府有二星而共屬一
府者况中國郡縣則有屬東夷朔方西域俱無屬或
星在南而屬在北星在東而屬在西其理殊不可解
雖星分翼軫之文傳自古昔君子所不道也聊誌之

以俟明者

幽并之域堯舜時謂之朔易其地去荆揚數千里氣苦
寒而多風非其土著至于手皸而足裂其居處服食
異用絺葛果茗魚鱸之物不能以易致今都城固古
幽州之地自成祖徙都以來帝王所止文物益開
風氣非復昔比然去都城北數百里外則所謂苦寒
多風手皸足裂者亦不能無然則風氣所固固未易
與南土齊也

土高者多亢旱地卑者多雨澤地氣之升有厚薄也昔
有登高山顛者忽見山腰陰雲四合望若大海山顛

烈日如故少頃雲散下山則聞有暴雨平地水盈尺可見雨澤高下不同今西北屢有旱魃且多蝗東南則少蝗患而淫雨之淹沒則每歲而有可見矣今爲西北計者宜多鑿池塘以貯積水多穿溝渠以引河流庶便車戽爲東南計者則高其隄岸使不上越疏其下流使不壅滯則水旱不能爲之災而民生有粒食之慶矣記曰天時有生地利有宜

輿地大勢西北高而東南下瀕海之地鑿二三尺輒得水山陝之地鑿井數仞而不及泉者土之厚薄殊也海至南極地愈卑則爲尾閭爲沃焦山陝至西北極

地愈高則爲崑崙爲葱嶺爲流沙大磧及至西域則
爲飛梯爲棧道所行俱攀山躋嶺無復坦途故曰形
如倚蓋其語良是宋儒謂崑崙極高四邊俱下未敢
以爲信然

西戎種類最繁光武閉玉門關謝絕西域以西域國度
最多故也漢時所使張騫大抵俱西域諸國若漢南
無王庭則北虜衰弱亦甚矣北狄至劉淵父子而後
盛種類頗少女真爲金始女直爲元始匈奴五種世
居沙漠東北亦號韃靼其餘土麻擺里荒等種不過
數國而已地雖廣漠大抵不生五谷渡瀚海而北入

民愈少聞有狗國等有無不可知矣惟西域則土產甚夥又多金銀明珠異寶號稱樂土海商遠賈多至焉

四海世傳有東西南海而無北海予究中國地形南濱於海則吳越閩廣是也東連朝鮮朝鮮之東亦有海西通西域大宛月氏大食諸國大食之外亦有巨海大食之西有國不可勝數大食陀盤所可至者惟木蘭皮耳自陀盤地國發舟正西涉海百日而至其國其地所產麥一粒長三寸瓜圍四五尺榴一顆重五斤桃二斤菜長三四尺穿井百丈方見泉胡羊高三

四尺尾大如扇西地氣厚故也雖然此但可見東西海之所至耳自東西而極於北則無可考證蘇武在匈奴牧羊海上謂之北海安知非東西海之所通者也一目國又在北海外然則北海有無亦未可知大海之中有弱水不能負芥北虜之地有流沙長數千里人不能渡均一水土也而有弱水流沙何故蓋水至東極下東海之東又其下者故爲弱水如莊生所稱尾閭沃焦之類地至西北極高流沙在古析枝渠搜虜境之外又西之西者與西域相近地最高故渟而成沙游蕩不定土高則成流沙水卑則成弱水高

卑之異也人以為異者特未察理耳

地極西北則寒極東南則熱極西極北則多風極東極南則多雨中國而外寒暑風雨更與中土異檐波國有城池種田天氣常熱地無霜雪孝臆國在平州中以木為柵有木柵五百餘所氣候常暖冬不凋落閣黎國自泉州發舶一月可到又無霜雪四時之氣常燠印都丹國地熱無雲此皆海外東南國度也吉慈厄國皆大山圍遶盤山為城多畜牧馳馬地極寒春下雪不消此中國外西北地也骨利國居回鶻北之瀚海海池出名馬晝長夜短日沒後天色正曛煮羊

方熟天已曙矣此中國外正北國度也以極北日出
早日落遲故晝長而夜短沙獬茶國係太陽西沒之
地至晚日落聲若雷霆國王每於城上聚千人吹角
鳴鑼擊鼓混雜日聲不然則小兒驚死此中國外極
西國度也勿斯里國屬白達節制人有七八十歲不
覩雨者止有天江不知其源水極甘溢則四十日浸
田水退而耕此中國外極西北國度也扶桑國在大
漢國東作板屋無城郭乃日所出之地此中國外極
東北國度也略舉數國而雨暘燠寒之候頓異如此
且以證宇宙內疆域之遠近云爾

匈奴之國其種有五一種黃毛者乃山鬼與黃犝牛所
生一種短項矮胖者乃獾獬與野猪所生一種黑髮
白身者乃唐李靖兵遺種也一種名突厥其先乃射
摩舍利海神女與金角白鹿交感而生射摩因手斬
阿珍首領至今以人祭纛一種乃塔巴赤罕之祖元
朝秘史云蒼色狼與白鹿交所生二十五世生帖木
真是稱大蒙古都長僭稱皇帝世居沙漠東北六千
里後居山陰號韃靼地產牛馬無城池屋舍隨水草
所居俗尚射獵帖木真四世孫忽必烈僭居中國稱
帝噫北狄自匈奴突厥以後劉淵父子始入中國而

莫盛於胡元今幸二祖以真人定世汎埽無遺但百年生聚韃靼尚强黃毛亦不絕歲寇中國可無履霜之戒哉

土官輕殺其俗教令使然且其人畏杖責而輕死故有少不順於其長指顧之間立取其首若甚易然曾有人宴於四川長官司客不敢舉箸彼以爲肴之不精也少額其首頃間已取廚役之首獻堂下矣客爲股栗彼迺甜然不爲意宣慰司法尤嚴忌卽父子亦遠數丈相接恐有傷害長官司之長每見吾漢人不作禮藉松茅爲茵蹲坐其上漢人卽與立談談竟漢人

出戶彼卽褫衣冠具戎裝而還入深山中不得其所
往雖服中國教令而夷性尚存如此

凡十五章

訂山川之疑

余弟嘉林太學會登太山云元君殿在山腰其日觀峯
乃是絕頂頂之左側有秦王封禪碑俗名無道碑碑
無文字或云歲久磨滅或云有套碑在上今不可知
右側有碑刻孔子小天下處予屢過河濟間惜不能
登也其山高四十五里盤礴三百里而上凡五十餘
盤望黃河如帶齊魯之山莫與京高矣噫登太山小

天下游聖門小群言信夫

峨嵋山在蜀爲最高峻蓋衆山盤礴而成山有三峯曰大峨峯曰中峨峯曰小峨峯登大峨夜半可望日出齊之泰岱楚之武當皆不及也李太白所稱峨嵋高出西極天羅浮直與青溟連者非妄九月前可上十月則雪已封徑不可上矣山之深邃處六月雪尚未消山僧最富而衆多至五六百每辦半歲衣糧以待冬春之用山孤嶺絕蓄厚僧饒每爲劫賊所覬覦然不能劫者以僧俱擅擊刺之伎故也

武夷之勝古今共傳吾鄉陸文裕公經武夷先觀瀑布

泉甚奇羽士特出一朱匣爲公焚香開視曰此魏王
仙子頭也魏爲秦人嘗昇仙時所蛻骨今藏之二千
年矣公締觀見廣顙獨異色滋潤可玩略無枯朽狀
公嘆異久之有石壁高數百丈當巖端陟絕處列朱
漆棺十餘口隱然可望問之山人曰此歷代神仙髑
髏也公曰縱荒誕然人跡不到豈有神工鬼斧闢巧
其間耶門生邀爲九曲之遊歷覽諸勝奇峯絕壑丹
崖碧潭誠兩都齊魯河洛間及會稽豫章諸處所未
有近聞上官以觀魏王子頭頗費迎送已瘞土中世
不可復見矣

蠓磯志云山在蕪湖大江中西北七里舊志云磯有石
穴廣一丈深叵測蓋蛟所居黃庭堅曾書蠓磯二字
今穴已平而黃書亦磨滅矣有人云山之西江深處
有四十丈戊申秋有黑龍見黑處水瀑漲二三丈許
忽涸見底疑卽蠓也我 太祖親征陳友諒戰鄱湖
廟神曾著靈應回鑾幸其廟御製七言詩一首云龍
車鳳輦出皇都蠓磯煙鎖在蕪湖千林紅葉秋來埽
萬里江山一樣摸蕩蕩長江俱左右明明日月照東
吳梅花纔報春消息瑞氣紛紛到處無嗚呼我
太祖經營四方日不暇給矣而猶投鞭賦詩照耀區

字此其所以爲聖文神武也

高大之山內多崆峒凡山以石爲骨以土爲皮以草木爲毛以水泉爲血今大山腹裏類可通行但人未搜訪鑿通耳卽今宜興張公洞驪山金沙洞之類見矣山之高者其洞多在高山之卑者其洞多在下亦有全實無洞者山之卑小者也有洞之山地中之氣上升蒸而爲水滴則流而爲泉山之卑小土實者則無泉以其中不崆峒也李白集云余聞荊州玉泉寺近青溪諸山山洞往往有玉泉焉則知泉自洞中氣滴而成果然矣遇有硫黃丹砂白礬則爲溫泉

余嘗登岳麓山見大禹碑文其碑乃石壁數十丈鐫字
如今刻刻後字蹟尚多字皆漫滅不知刻自何人乃
科斗書應是三代時人刻也後人勦字後之漫滅處
刻曰右帝禹刻實非全文也今見有楊升菴諸公譯
文大都依約其字成文耳恐非實見大禹周流天下
治水胼胝手足由已飢溺鑿龍門疏砥柱無刻而獨
刻之岳麓何哉

嘗聞諸縉紳云大禹鑿龍門處其兩涯之石小者如舟
大者如屋云是當時所鑿不知當時人工何以能鑿
如是巨石且昇而置之兩涯也相傳大禹授天符射

河伯斷脩蛇禽封豨行游四方俱乘龍故有豢龍氏
御龍氏所役使盡丁甲不妄其從行有防風氏會稽
後至執而戮之其骨專車則當時之人工可知矣開
萬世之太平雖禹之功孰非天之所命哉疏濟潔決
汝漢排淮泗驅蛇龍而放之蒞人力殆不至是

筆談云溫州鴈蕩山天下奇秀然自古未見圖牒祥符
中因伐材始見尚未有名謝靈運爲永嘉守凡佳山
水處遊歷殆徧獨不言此山蓋當時未有鴈蕩之名
也予觀鴈蕩諸峯皆峭拔險怪上聳千尺穹崖巨谷
不類它山皆包在諸谷中自嶺外望之都無所見至

谷中則森然干霄原其理當是爲谷中大水衝激沙
土盡去惟巨石巋然挺立耳如大小龍湫水簾之類
皆是水鑿穴自下望之則高巖峭壁從上觀之適與
地平以至諸峯之頂亦低於山頂之地面世間溝壑
中水鑿之處皆有植土龕巖亦此類耳觀筆談所記
如此因悟武林之吳山有紫陽巖姑蘇之虎丘有千
人坐劒池諸石奇峯壁立嶮峭可翫大都因城市密
邇取土供築土洗石出耳若去城遠之山則未見有
此奇秀者以此例觀與鴈蕩爲水衝而成之意頗類
黃河舊不得其源故有謂黃河之水天上來又有謂百

川入海海水復至崑崙流出爲河以比丹家身中運
轉之妙又謂張騫乘槎入河上與天河通見牽牛織
女星此皆妄說河源雖遠大都因數千里無水積氣
甚厚故迸出爲泉百泓流衍遂盛實與今中國泉河
相類人咤所未見故異其說及見海水日夜東流未
知歸著何處故謂其周流復始殊不知海水聚蓄既
盛水復升而爲氣爲雲爲雨爲人爲物譬如糟粕燒
酒潏然升爲水氣氣降爲酒亦猶水升爲氣氣復爲
水初非二事大抵五行皆能流轉不窮如水能爲土
土復能爲水今江干土崩入江卽化爲水而水之淤

淀卽成洲渚無足怪者一元之氣元自無定人所見
狹隘不能通曉耳

元世祖至元二年窮河源時遣招討使都實行四閱月
始抵其地旣還圖形勢具載元史其言黃河本東北
流歷西蕃至蘭州凡四千五百餘里始入中國又東
北流過虜境凡二千五百餘里始轉河東又南流至
蒲州凡一千八百餘里通計屈曲九千餘里卽今世
所傳河源圖是矣此所謂真河源也漢張騫持節西
域訪河源以爲二水發葱嶺趨于閩匯鹽澤伏流千
里至積石而再出此乃在今訪河源萬里外當時爲

吐蕃遮隔不得假道故也諸公謂世之受蔽於外舍
近而求遠者何以異此其說良然

客有爲予談瞿塘之險者云水流兩山中兩崖壁立數
十仞陡絕不可攀崖上多猿猱每飛石以投舟中舟
中人虞爲所中日色爲兩山遮蔽不得下照水色沉
黑水流急甚遇巨石則番噴而爲雪浪江中石林立
舟少涉之輒破塘有三峽轉屈間稍不謹則舟撞石
崖不可救且水深無底不可著篙全賴舵師攔頭之
力順流而下行一月或不及一月出峽溯流而上則
須二三月方至萬里亭崖上挽舟者用鑼舟中用鼓

兩相照映方可行舟否則不能也峽門窄而上如環
四五月中水大漲則舟不得過太白所歌白帝城邊
足風波瞿塘五月誰敢過是也天下之險莫與倫比
因語予曰若人未曾經此創見必成悸疾

灩澦堆在夔州巫峽口冬出水二十餘丈夏水漲半沒
水經云灩澦大如馬瞿塘不可下灩澦大如象瞿塘
不可上以此爲水候杜子美詩謂高江急峽雷霆鬪
古木蒼藤日月昏景象如此則知客談蜀險語自不
妄

古人第品天下之水謂江心水第一惠山泉第二虎丘

泉第三予以爲此非善論水者也天下泉源至多豈可以江南數水盡之其所第之水寒冽清澈予得而嘗之誠有之矣然水淡土薄泊乎無味孰若大江以北之水山東之趵突泉北都之神山泉泉河之七十二泉渾厚清融與江心諸水較量恐未可以優劣論使當時陸羽諸君生此其品量當不在江南諸泉下也姑誌之以俟知水味者評焉

凡天下水泉三億三萬三千五百五十有九其在遐荒絕域殆不可得而知其江河自西極達於東溟中國之大川者也其餘百三十有五水是爲中川者也其

千二百五十有二水是爲小川者也若渭洛汾濟漳
淇淮漢皆亘達方域通濟舳艫徙有于無利於生人
者矣其餘陂澤魚鼈莞蒲秔稻之利不可備數予謂
水泉大爲天下利源然亦能爲害故順之則利逆之
則害民猶水也其毋逆水之性哉

辛氏三秦記云驪山西有溫湯先以三牲祭乃得洗不
祭則爛人肉俗說云秦始皇與神女戲不以禮神女
嚙之生瘡始皇怖謝乃爲出溫泉洗之立愈漢魏以
來相承云能蕩邪蠲疫今在新豐縣西後周庾信有
溫泉碑唐置溫泉宮常所臨幸又京兆府藍田縣有

石門湯岐州郁縣有鳳凰湯同州有北山湯河南府
有滎渾湯汝州有廣成湯天下諸州往往有之然地
氣溫潤生物尤早卉木凌冬不凋蔬果入春先熟比
之驪山多所不逮噫水有溫泉之湯池火有蕭丘之
寒焰物理難一固如是夫

凡十五章

推篷寤語卷之七